



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 6

**Karnataka nung sen crore 82 kaktetba ya BJP sen lir: DK Shivakumar**

**Himanta Sarma-i Northeast sobaliba raksatsür: Rahul Gandhi**

VOL. XXI NO. 11 (ADOK 11) DIMAPUR RASEMNNÜ (WEDNESDAY) MONGPUTENI (OCTOBER) 18, 2023 ₹ 5.00

## Vyasan R, IAS-i Nagaland CEO inyaksü Tapi assembly by-election nung candidate 2 tokteptsü akok

**Kohima, October 17, 2023 (DIPR):** Election Commission of India (ECI)-i state sorkar den asungdangteper Chief Electoral Officer (CEO) tasen ka shimogo. Nagaland state nung CEO inyaksü atema Vyasan R, IAS shim aser tanga tetuyuba ka magütsü tashi pai iba mapa inyaka atatsü ta CEO Office-i ashi. Vyasan R-i V. Shashank Shekhar, IAS ket nungi CEO

mapa melenzüker. Pai CEO mapa magizükdang Nagaland sorkar kübok tanga mapa inyaka aliba ajak toktsütsü. Vyasan R-i CEO Nagaland inyaktang State Secretariat nung Secretary to the Government in charge of the Election Department dak alaka Nagaland sorkar kübok tanga mapa kecha meinyaksü ta CEO Nagaland office-isa metetdaksü.



(Temalen) NDPP headquarters, Chümoukedima nung NDPP president Chingwang Konyak-i Wangpang Konyak nem party ticket agütsüba aser (tsünglanglen) Congress Bhavan, Kohima nung NPCC president S Supongmeren Jamir-i Wanglem Konyak party nung pelaa agizüdang agiba noksa angur.

## Aluyimba nung modern technology amshitsüla

**Kohima, October 17, 2023 (TYO):** Tsüngsang-mopung melenshiba ajanga tsünusenbongbaren nung timtem ajurur anungji aluyimba maparen nung modern technology amshitsüla ta Agriculture Advisor Mhathung Yanthan-i ashi. Advisor Yanthan-isa Agriculture department nung ketdangsurtem dang teblemtsü khuret abentsü aser bendanga agütsüshitsü tayongzükba agütsü. “Asenoki aluyimba nung modern technology amshitsüla. Food production mapa nung food supply aser food security alitsüla, kechiyong asenok peritsü atema dang masü saka sen yokzüksü atema chiyungtsü talila adoktsüla” ta Hotel Japfu nung Agriculture department state level review meeting nung pai ashi. Ketdangsurtemi aluyimertem dak temulung agütsütsüla aser

parnok shishilembatsü atema yaritsüla, ta Advisor Yanthan-isa ashi. “Nagaland nung Common Agricultural Policy ka teyangludak lir aser iba ajanga aluyimertem yaritsü. Anungji ketdangsurtem aser staff ajak tebilemba lemsateptsü nenshir” ta paisa ashi. Senden nung Agriculture Production Commissioner, R. Benchilo Thong-ia SDAOs aser DAOs dang mapa shitak inyaksü aser pei pei mapa lemsüka aliba tesemtem nung khuret balala koktetsü ayongzük. Tan Rabi season arudang field officers aser staff ajak pei pei mapa lemsükdak alitsü ayongzüker ta Benchilo-isa ashi. Additional Director C. Peter Yanthan-ia 2030 tashi nung aluyimba jenjang tajungba akümtsü aser Common Agricultural Policy takok ngua inyaksü atema metetdaksü.

**Dimapur, October 17, 2023 (TYO):** Mon district kübok Tapi assembly constituency by-election nung party ana dang tokteptsü akok. Mongulbarnü Nationalist Democratic Progressive Party (NDPP)-i Wangpang Konyak nem ticket agütsü aser külen Nagaland Pradesh Congress Committee (NPCC)-ia parnok candidate atema Wanglem Konyak shimba osang metetdaksüogo. Tapi assembly constituency by-election ya November 7 nü agütsü. NDPP MLA aser Noke Wangnao-i iba constituency nungi kümsük tuguben tashi MLA inyaka arur August 28, 2023 nü pa alima nungi pilaa ao. October 17, 2023 nü NDPP headquarters, Chümoukedima nung NDPP president Chingwang Konyak-i Wangpang nem party ticket agütsü. Arishi küm 39 tain Wangpang ya Directorate of New Renewable Energy nung Superintendent inyaka liasü saka by-election nung tokteptsü atema mapa nungi sodi agiogo. Wangpang ya aser Noke Wangnao indang personal secretary liasü.

Pai NDPP party nung shilem balaka agia maru saka aser Noke den tesüba küm 15 inyaka arudang party nungi aika angazükogo ta Wangpang-i ashi. Election nung takok ngura terenlok maparen nung temulung agütsütsü aser aser Noke senmang benshia aotsü kechiyong pai (Noke) party aser Nagaland sensotem atema shilem tulu agiogo ta Wangpang-isa metetdaksü. “Yashi ni voter ka dang liasü saka tanü 43 Tapi A/C atema candidate ka ama noktaker. Party-i nungloktsüba ama ni party ticket agizüker” ta paisa ashi. Paisa Chief Minister Neiphiu Rio aser NDPP president Chingwang Konyak na dang pelaba shisem. NDPP president Chingwang Konyak-ia party züngsemtem dang Wangpang nem takok ngudaksütsü atema inyaksü ayongzük. “By-election asüyonga election anungji zübazüba magütsüla. Nagaland nung NDPP-i aniba sorkar lir anungji party candidate-i takok angutsü tamang akar. Saka asenoki ulua mebilemli kechiyong yamaji

bilemra tamakok angutsü” ta Chingwang-isa ashi. Environment, Forest & Climate Change and Village Guards Minister CL John-ia party züngsem ajak dang party candidate pusemstsü aser takok tulu ngudaksütsü ayongzük. Taküm February assembly election nung Tapi constituency nungi JD-U aser National People’s Party candidate ana toktepa liasü saka tan by-election nungbo tenaprongi NDPP candidate yaritsü lemtetogo. **Congress candidate:** Külen, Mongulbarnü Congress-ia Tapi constituency by-election atema candidate ka shimba osang metetdaksüogo. Congress indang candidate ji Wanglem Konyak lir. Taküm assembly election nung Wanglem-i Naga People’s Front (NPF) ticket bener toktep aser votes 82 ajanga NDPP candidate Noke Wangnao den tamakok angu. Wanglem-i tawa tu Congress nung züngsem aküm aser Hombarnü Congress Bhavan, Kohima nung sentong ka agidang NPCC president S Supongmeren Jamir-i pa party nung agizüka liasü.

## Dimapur nung DCC-i drugs aika raksaa endok



**Dimapur, October 17, 2023 (TYO):** Police Commissionerate, Dimapur nung Drugs Disposal Committee (DCC) ajanga Mongulbarnü mozü aika raksaa endokogo. Commissioner of Police, Dimapur Kevithuto Sophie-i anir DCC ajanga DMC dumping ground nung iba mapa inyak. Iba mapang OCP Dimapur, OCP Chumoukedima, SP (Crime) PHQ aser District Administration den civil society

balala nungi teshimtet nübotem aden. Tanü Drugs Disposal Committee (DCC)-i Chief Judicial Magistrate Dimapur lia Rs. 18,49,85,085 jenjang heroin, ganja, opium, spasmoxon, crystal meth, WY tablets. sunflower, brown sugar, areca nuts, cough syrup raksaa endok. DCC-i raksaa endokba mozütemji 2018 nungi 2022 tsüngda NDPS ken o 82 kübok apuba drugs liasü.

nung alirtemi timtem balala ajuruba onüktem benoka lemsatep ta Vigilance Committee, Naga Council Dimapur aser Dimapur nung aliba civil society organisations (CSOs) külem senden ka amendang teblemtsü aika benoka jembir lemtet kar agiogo. Senden nung adenertemi telok balalai ozüing alema tax saruba, kechisarena ajak nung jenjang atuba, ozüing alema nisung kanga aruba, RIIN, syndicate system, lenmang majungba, drugs teblemtsü, traffic/parking khurettem den ano Dimapur

## Dimapur nung ozüing alema inyaksangshi azüoktsü

**Dimapur, October 17, 2023 (TYO):** October 17, 2023 nü Vigilance Committee, Naga Council Dimapur aser Dimapur nung aliba civil society organisations (CSOs) külem senden ka amendang teblemtsü aika benoka jembir lemtet kar agiogo. Senden nung adenertemi telok balalai ozüing alema tax saruba, kechisarena ajak nung jenjang atuba, ozüing alema nisung kanga aruba, RIIN, syndicate system, lenmang majungba, drugs teblemtsü, traffic/parking khurettem den ano Dimapur

nung alirtemi timtem balala ajuruba onüktem benoka lemsatep ta Vigilance Committee, NCD Convenor Joseph Lemtur aser aser Co-Convenor Hotoshe Sumi nati sangdong ka nung ashi. Vigilance Committee-i ozüing amertem den yaritepa Dimapur nung drugs aser ozüing alema tax saruba inyakyim azüoktsü atema inyaktang kin teloktemi volunteers agütsütsü atema senden nung lemtet. Senden nung adenertemisa India sorkar dang tekaratiba nung Naga yimten latetsü atema memorandum ka zültsü lemtet.

Parnokisa “Sorkar Ka Tax Ka” tangatetba nungi masetshitsü bangjemtep aser welfare/Union/Organizations kari danga tax mesüra tenla sarua senzüba putetra ozüing tapet agi merenshitsu telemtetba agi. October 17, 2023 nü Naga Council Office, Dimapur nung amenba senden nung Civil Societies Organizations 100 tema nungi teshimtet nübotem aden. Senden nungsa Chakhroma Public Organization(CPO), Western Sumi Hoho (WSH) aser Naga Council Dimapur (NCD) tirtem aden.

## Nagaland nung SDGCC website aser SDG Dashboard semzükogo



Capital Convention Centre, Kohima nung October 17, 2023 nü Sustainable Development Goals Coordination Center (SDGCC) website, SDG Dashboard semzükba mapang tangokba noksa nung angur.

**Dimapur, Mongputeni/Oct. 17 (TYO):** Sustainable Development Goals Coordination Center (SDGCC) website, SDG Dashboard semzükba aser SDG Action Awards 2022, SDG Innovation 2.0, aser SDG Essay Competition 2023 nung takok angur nem senpet agütsüba sentong ka October 17, 2023 nü Capital Convention Centre, Kohima nung agia liasü.

Iba sentong nung Deputy Chief Minister in charge of Planning & Transformation and National Highways T. R. Zeliang ajanga Sustainable Development Goals (SDGs) aser yangji sendaka aliba indang jembia liasü.

SDGs ya alima ajunga atema lir aser yangji ajak asoshi yimchiyimjung, ajak sako aser tanen makai inyaktetsü asoshi mangdang kasa indang lir, ta pai ashi.

Nagaland nunga terenlok maparen ya SDG 2030 agenda den lirumedema inyaktetsü meranger.

Tang asayaba online sapangtem nungya SDGCC website aser SDG Dashboard lir, koba osangtsüsang angudak, telok balala lungjemer inyaktetsü asoshi animesoba, sustainable development tsütsü Nagaland tejakleni renloka aoba indang real-time data agütsütsü.

"Item ya hadir dang masü, item ya ochishia renlokba nung asenoki inyakba indang maitsü

lir," ta Zeliang-i ashi.

SDGs amshitsü asoshi mera agiba nung Nagaland ya mezünpur rongnung dena lir. Northeast India nung SDG Coordination Center amenokba state mezünpur lir, koba Department of Planning and Transformation nung lir.

SDG Vision 2030 mezünpur yangluba Indian state tem rongnunga ka lir. Ministry of Statistics and Programme Implementation ajanga October 31, 2022 nü Delhi nung ayongzükba national workshop nung 'developing the sub-state indicator framework' nung SDG best practices sayutsü asoshi state pezü shimba rongnung Nagaland ya liasü.

Item website aser dashboard sayaba aser sempet agütsüba sentong agiba sülen 'State-level consultation on the National Multidimensional Poverty Index (MPI) 2023: Performance Analysis of Nagaland and Way Forward' agia liasü, kong shisalen sayur ya NITI Aayog aser United Nations Development Programme (UNDP) nungi liasü.

*Nagaland SDG Action Awards 2022 takok angurtem yamai alitsü:*

- 1. Economic Sustainability:** Noklak district nungi Noklak Masterpieces.
- 2. Social and Community Upliftment:** Peren district nungi The Banana Co-Crafts & Rural Tourism.

**3. Environmental Sustainability:** Zunheboto district nungi Asukhomi Community Reserve Management Committee.

SDG Innovation Participatory Action Research 2.0 nung takok angurtem:

- 1. Household Level Sustainable Management of Food Waste Using Black Soldier Fly (Dimapur District).**
- E-Waste Management: Awareness - Advocacy Recycling (Dimapur District).**
- Sustainable Production of Bamboo Products in Shetap Farm (Longleng District).**

'My 2030 Vision for a Sustainable, Equitable, and Green Nagaland' omen nung ajemdaker agiba SDG Essay Competition 2023 nung takok angurtem: 1st Place (15 years and below): Eunice Y Kikon, Isaiab Ability Higher Secondary School, Wokha. Runner-Up (15 years and below): Tokavi K Rotokha, Natha Village, Zunheboto.

'Localizing of SDGs & Traditional Value System: Prospects, Challenges & Strategies in Nagaland (16 years and above)' omen nung ajemdaker SDG Essay Competition 2023 takok angurtem: 1st Place Keyzaizeule, Bethesda Higher Secondary School, Dimapur. Runner-Up Kekhriesino Meyase, Ashoka University, Sonipat.

## Rotary Club Kohima-i District Governor Rtn. Nilesh Kumar agizük

**Kohima, Mongputeni/Oct. 17 (TYO):** Rotary Club Kohima ajanga October 15, 2023 nü District Governor Rtn. Nilesh Kumar Agarwal agizüka liasü.

District Governor ya meina pa kinungtsü Lakshmi Agarwal, Rtn. Dr. Nitin Agarwal, Assistant Governor Zone 17

aser Rotary Club Dimapur nungi züngsemtem arua liasü.

Iba sentong nung Rotary Club Kohima tir Rtn. Kevileno Solo-i pela agizükba o jembiba sülen Rtn. Miriam Rengma-i club inyakyim aser takok balala anguba indang osang tejangja agüja liasü.

Iba sentong nung

Seyievinuo Chuzo ajanga ken tajung ka tena sentong tali lemladaktsü.

District Governor Rtn. Nilesh Kumar Agarwal-i o jembidang Rotary züngsem ajunga dang bendanga agütsür inyaktetsü aser nüburtem tenzükba nung pela inyaktetsü ajungshia liasü.

## VHC Chakhabama nung MTS post atema application meshir

**Dimapur, Mongputeni/Oct. 17 (TYO):** Gauhati High Court Kohima Bench ajanga W.P(C) NO.64/2016 (MhalevizoThevo vs. State of Nagaland &Ors) ken o nung July 24, 2023 nü obendang agütsüba ama Veterinary Health Center (VHC) Chakhabama nung Multi-Tasking Staff (MTS) ka asoshi Kohima District nung aliba lisopur dang nungi applications meshir.

Iba mapa ya Pay Matrix

Level-I küboki aiter aser ibai Chief Veterinary Officer, Kohima, Department of Animal Husbandry & Veterinary Services, Nagaland, Kohima kübok lir.

Applications aser danga osang tejangja ya Directorate of Animal Husbandry & Veterinary Services, Kohima nungi angutsü. Application ya October 26, 2023 tashi dang agizüktsü, ta sangdong ka ajanga ashi.

## Nagaland Zeliang Public Organization-i DY. CM TR Zeliang ajuru



Nagaland Deputy CM, TR Zeliang den NZPO Kohima Unit ketdangsürtem October 17, 2023 nü tangokba noksa ka yangi angur.

**Dimapur, Mongputeni/Oct. 17 (TYO):** Nagaland Zeliang Public Organization (NZPO) Kohima Unit tir Neiba Newmai-i anir ketdangsür pezü October 17, 2023 nü Deputy CM TR Zeliang den par kidang

ajurutepa liasü. Iba mapang parnoki Deputy CM nem tenütsang agütsü aser sensaksemba mapang NZPO Kohima Unit ajanga maparen balala inyakba aser ken o balala lemsatempa liasü.

## Kohima College Autumn Carnival agiogo

**Dimapur, Mongputeni/Oct. 17 (TYO):** Kohima College nung telungjem aser temeim sayua October 16, 2023 nü küm shia amungba Autumn Carnival sentong agia liasü.

Iba sentong ya Skill Development Cell aser Students Welfare Committee lungjemer ayongzükba liasü, koba pelatempa süyiba anogo ka dang masü saka mapa tajung inyakba nung shilem agia liasü.

Iba carnival nung "Contributed Items Stall" ka lapoka liasü, kong faculty, staff aser kaketshirtemi osettsüset tabu balala tenla agüja liasü aser ajakji jenjang talang yong ayok.

Iba stall nungi yokzükba sen ya "Need-Based Grant-in-Aid"

fund dangi aotsü, koba ajanga tepetzük kibong nungi shisaliok bushiba kaketshir nem senotsü teyari agütsütsü.

Iba sentong nung menden Kethosenuo Kesiezie-i shisaliok nung senotzü tsütsü tetsükdaksü alibattem rakdangtsü asoshi kaketshirtem aser college-i meranga inyakba indang jembia liasü.

Iba mapa tajung asoshi Kohima College-i bendanga agütsür inyakba kuliji "Contributed Items Stall" ya lir.

Ibai mezünpur 2017 küm "Poor Students Fund" nungja agütsür tenzük aser iba mapang Nagaland Angh inyaka alisang PB Acharya-i sen 10,000 agütsüba nungi tenzükba liasü aser tangbo Kohima College nung makamaiter kaketshirtem academic tsütsü pei nükjidong tongtetba nung tongtipang ka kumogo.

Iba sentong ya tenzükba Khekali Sema-i sarasadema tenzük aser iba sülen Dr. Vitsosie Vupru-i tarur pela agizükba carnival lapoktsü.

Iba sentong nung Minister, Higher Education & Tourism, Temjen Imna Along arua adenba ajanga sentong tali meraketa liasü.

Pa adenba ajanga sorkari region nung shisaliok aser tourism tsütsü bendanga agütsür inyakba sayur.

 <b>बैंक ऑफ बड़ोदा</b> <b>Bank of Baroda</b>		<b>CIRCULAR ROAD BRANCH</b> Ground Floor, Faith Building, Near Kharmahal Traffic Point, Dimapur, Nagaland- 797112, Email: vjdima@bankofbaroda.co.in		<b>SALE NOTICE FOR SALE OF IMMOVABLE PROPERTIES</b> APPENDIX- IV-A [See proviso to Rule 6 (2) & 8 (6)]	
Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker E-Auction ajanga kiojen ayoktsü notice. Public aser talisa sen apur (tem) aser Guarantor (tem) dang, tsünglanglen shia aliba kiojen, koba Secured Creditor, <b>Bank of Baroda, Circular Road Branch, Dimapur, Nagaland</b> dang mortgaged/charged süa liasü, ibaji Authorised Officer of <b>Bank of Baroda, Circular Road Branch, Dimapur, Nagaland</b> , Secured Creditor-i agiadokogo aser tsünglanglen shia aliba senotsü alangzüktsü atema iba kiojenji "Kong koma ali", "Koma lidir yamaji" aser "Yangji aliba ajak" ayoktsü. Sen apur/tem / Guarantor/tem / Secured Asset/tem / sentsüh / Reserve Price / e-Auction anogo aser mapang, EMD aser Bid Increase asüba senji tsünglanglen shia lir:- <b>Status of Possession:</b> Physical <b>Property Inspection anogo aser mapang:</b> 27.10.2023 & 10:30 AM nungi 4:00 PM <b>Sentsüh ajak agi:</b> 29.12.2021 anogo tashi nung Rs.1,11,10,006.32 (Rupees One Crore Eleven Lakhs Ten Thousand Six and Paise ThirtyTwo Only), iba dak alia sen tetemlok aser tanga charges adentsü.					
Sl. No.	Name & address of Borrower/s / Gurantor	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.	
1.	<b>1. MR. CHINNY MAGH (BORROWER)</b> House No.208, Industrial Village, Razhuphe, Dimapur, Nagaland State- 797112. <b>2. MRS. NAOMI MAGH (CO-BORROWER)</b> House No.208, Industrial Village, Razhuphe, Dimapur, Nagaland State- 797112. <b>3. MR. SENILO MAGH (GUARANTOR)</b> S/o Chinny Magh, H/No. 208, Industrial Village, Dimapur- 797112, Nagaland.	A land measuring 0B-1K-18L and building thereon situated at Padumpukhuri, Dimapur covered by Patta No.1202, Dag No.295/1671 standing in the name of Shri Chinny Magh, S/o Late Ashiwa Magh. <b>Bounded by:-</b> <b>North:</b> Plot of Lanu Ao, <b>South:</b> Approach Road, <b>East:</b> Plot of N. Konyak, <b>West:</b> Plot of Bohovi Awomi.	03.11.2023 1:00 pm to 3:00 pm	Rs. 47,50,000.00  Rs. 4,75,000.00  Rs. 50,000.00	
Telatetbatem aser osang tejangja agüja aliba link nung angutsü <a href="https://www.bankofbaroda.in/e-auction.htm">https://www.bankofbaroda.in/e-auction.htm</a> and <a href="https://ibapi.in">https://ibapi.in</a> Date: 18.10.2023 Place: Dimapur Authorised Officer Bank of Baroda, Circular Road Branch					

# Madhya Pradesh election: Congress-i manifesto sayaogo



**New Delhi, Mongputeni/October 17 (Agencies):** Madhya Pradesh nung November 17 nü election agitsü lia Congress-i Mongolbarnü parnok indang manifesto sayaogo, kong ajak atema sen lakh 25 health aser lakh 10 insurance schemes, caste census ka, nashiscü seret nung sen 2 agi alitsü tenangzükba agütsüba densema lir.

Vachan Patra ta nungja agütsür manifesto sayaba sentong nung taoba Chief minister Kamal Nath, Rajya Sabha züngsem Digvijaya Singh, Congress indang manifesto committee tekolakba Rajendra Singh aser campaign committee chief Kantilal Bhuria nung densema liasü.

Nath-i, pai Madhya Pradesh nungi Indian Premier League team ka adokdaksünir ta ashiba den asayartem atema scheme ka lapoktsütsü

tenangzükba agüja liasü. Congress-i aluyimertem loan nisung shia dang sen lakh ana tashi atoktsü aser iba den mapa mangu aliba lanurtem nem küm ana atema itashia sen 1500 nungi 3000 tashi agütsütsü nangzükogo.

Manifesto nungsa tetsürshia nem ita shia sen 1500 agütsütsü, LPG cylinder sen 500 agi agütsütsü, power unit 100 tashi atsükba atema kecha taa magitsü aser unit 200 atsükba atema tariff tesadang dang agitsü, pension scheme tejenba tenzükshitsü, irrigation atema aluyimertem nem angati power agütsütsü aser Other Backward Classes atema menden shilem 27 mekazüka toktsütsü tenangzükba agütsüo.

Maneni Congress-i, class 1 nungi 12 tashi nung aliba kaketshirtem nem ita shia sen 500 nungi 1500 tashi agütsütsü nangzükogo, koba Congress

lenir Priyanka Gandhi Vardra-i Mandla nung lokti senden ka nung sangdonger liasü. Parnokisa sorkar mapa 200000 tazüing aliba süngtsütsü tenangzükba agüja liasü.

Kasa mapang nung Chief minister Shivraj Singh Chouhan-i iba manifesto ya teyazü onüktem bendenba lir ta shiogo. "Küm pongu tejakdang Kamal Nath-i tenangzükba 900 agütsü saka tekua benoka minyak. Nüburtemi Congress dak tamang makar aser BJP party-i tenangzükba ataloktsür ta parnoki meteta lir. Congress-i nüburtem manisatetsü," ta CM-i ashi.

Madhya Pradesh, Rajasthan, Telangana, Chhattisgarh, aser Mizoram nung November 7 nungi 30 tsüingda election agitsü aser result December 3 nü sangdongtsü. 2024 küm national election magi tsüingda iba ya tatembangbuba election asütsü.

# Karnataka nung sen crore 82 kaktetba ya BJP sen lir: DK Shivakumar

**New Delhi, Mongputeni/October 17 (Agencies):** Karnataka deputy chief minister DK Shivakumar-i Mongolbarnü ashiba agi, tawa state nung sen crore 82 kaktetba ya Congress den sendaktepa lir ta BJP-i ashiba aija JP Nadda-i aniba party ya ochi mashi inyakym tamendakdak lir. Congress lenir-i ashiba agi, Income Tax department-i meita aoba mapang kaktetba sen aser osettem ya BJP lenirtem meyong lir.

"Ochi mashi inyakym ajak ya BJP-i benoka inyaker. BJP ya ochi mashi inyakym tamendakdak lir, ibayongji Karnataka-i parnok mintokogo. Sen ngutetbatem ya BJP lenirtem den sendaktepa lir aser iba ya Congress sorkar den

kecha sendaktepa mali," ta pai ANI dang ashi.

October 12 nü Income Tax Department-i, Karnataka, Andhra Pradesh, Telangana, New Delhi nung sorkar contractor aser real estate developer tem indang ki meita aoba mapang sen crore 94, sen crore 8 alang hon aser sentilong aser sen tasak jenjang anütsü 30 tashi nguteta liasü.

Sen crore 42 Karnataka nung contractor ka adianu ka tenüing agi Ambikapathy'er kidang nguteta liasü. Taoba küm Ato Kilonser Narendra Modi dangi state sorkari ochi mashi inyakym benoka inyakba indang ashishia züluba state nungi contractor tem rongnung iba contractor ya-a densema liasü.

Deobarnü Bengaluru builder

ka kidang nungi sen crore 40 nguteta liasü.

BJP-i Deobarnü ashiba agi, election agitsü aliba state 5 nung sen intoktsü atema Congress-i Karnataka ya ATM machine ama amshir.

"Sen crore 42 Ambikapathy'er kidang nungi ngutetogo. Ano sen crore 40 Santhosh Krishnappa'er kidang nungi ngutetogo. State pongu nung election agitsü aliba dak sendakba nung onok ket nung osang lir. Sen ajak ya Congress meyong lir. Onoki taoba mapang Karnataka ya Congress sorkar asoshi ATM asütsü ta shiogo. Tang iba ya shitak ta jangjaogo. Biushisüingdangba sülen ochi jangjatsü. Onoki CBI nem iba ken o bushisüingdaksütsü akhanger," ta BJP lenir CT Ravi-i ashi.



Bihar Chief Minister Nitish Kumar aser Deputy Chief Minister Tejashwi Yadav nati Patna nung tenangzüktepba sentong agiba mapang MLC tasenba Rajvardhan Azad den ajurutepba noksa nung angur.

# Ita-i nisung yoktsü atema nukjidong ayutsüla: PM Modi

**New Delhi, Mongputeni/October 17 (Agencies):** Ato Kilonser Narendra Modi-i Mongolbarnü ashiba agi, 2035 tashi nungbo 'Bharatiya Antariksha Station' (Indian Space Station) amenoktsü aser 2040 tashi nungbo India nunger mezüingbuba ita-i yoktsü atema India-i nukjidong ayutsüla.

India indang Gaganyaan mission terenlok asadangtsü atema PM Modi lenisüba nung senden ka mena liasü.

"Iba sentong kübok Chandrayaan mission ishika, Next Generation Launch Vehicle (NGLV) ka yanglutsüba, launch pad tasen ka yanglutsüba, human-centric Laboratories aser associated technology tem amenoktsüba densema lir," ta PM office sangdong ka ajanga metetdaksü.

Tawa Chandrayan-3 aser Aditya L1 Mission takok ngua benokba sülen tang iba sentong yangludat.

PM Modi-i India nung scientist tem dang, Venus Orbiter Mission ka aser Mars Lander ka densema interplanetary mission tem atema inyaktü asoshi ayongzükogo.

Gaganyaan project ya nisung asem anogo asem atema 400 km orbit kati yoka

parnok alimai tanaben meyipa anir alutsü atema human spaceflight capability sayutsü atema lir.

Gaganyaan mission atema crew tem anüing anir atutsü asoshi human rated launch vehicle ka, anüing nung crew nem alima ama environment ka agütsütsü asoshi Life Support System, crew tem training, recovery aser rehabilitation asoshi evolving crew management aspects aser crew emergency escape provision amala tongtibang technology tem yanglutsüba densema lir.

Iba sentong ajanga India ya alima nung US, Russia, aser China sülen manned spaceflight mission ka amenokba linük pezübuba akümtsü.

Senden nung Department of Space-i, Gaganyaan mission dak sendakba osang agütsü kong human-rated launch vehicles aser system qualification amala tang tashi nung yanglur aliba technology tem densema lir.

Parnokisa, Human Rated Launch Vehicle (HLVM3) uncrewed mission asem densema tongtibang test 20 shi agitsü aliba indang metetdaksü. Crew Escape System Test Vehicle mezüingbuba demonstration flight October 21 nü agitsü.

# India-i laptop, computer import asütsü nokdang: US & Korea-i tebilemtsü akaba lemsatep

**New Delhi, Mongputeni/October 17 (Agencies):** India-i laptop aser computer import asüba tenokdangba agütsütsü telemtetba agiba dak sendakba nung US, China, Korea aser Chinese Taipei-i tebilemtsü ka-a bilemba World Trade Organisation (WTO) senden nung lemsatepogo, ta ketdangsür kati metetdaksü.

Iba tebilemtsü ya WTO indang Market Access Committee senden nung lemsatapa liasü. Iba senden ya Paraguay nung lenir Renata Crisaldo lenisüba nung October 16 nü Geneva nung mena liasü. US-i ashiba agi, iba jenjang agiba ajanga item osettem shishilembaba nung tetsükdaksü adoktsü, kong US-i India dangi osettem yokba densema lir, ta Geneva nung amendaker aliba ketdangsür kati ashi. America-isa, iba telemtetba agiba ajanga exporter tem aser item oset amshirtem asoshi ken o mejangjai kümdaktsüo, ta ashi.

Linük nung osettsüt yangluba jenjang tajungba kümdaktsütsü aser China amala linük nungi oset bener aruba tajemba kümdaktsütsü nukjidong nung

India-i laptop, personal computer (tablet computer densema), micro computer, large/mainframe computer aser tanga data processing machine tem tangalen nungi bener marutsü tenokdangba agütsü.

Iba tenokdangba ya November 1 nü nungi benoka inyaksangshitsü.

Ajisüaka Commerce Secretary Sunil Barthwal-i taoba hopta ashiba agi, India-i import tem dak sendakba nung license memeshitsü saka bendanglen nungi aruba osettem asadanga atatsü.

Ketdangsüri ashiba agi, India-i tenokdangba agütsüba ya WTO temzüing ozüing den mapet ta bilemba Korea-i lemsatepogo aser iba ajanga nüngdak makaba nung shishilembaba tsütsü tetsükdaksü adoktsü, ta shiogo.

Seoul-i India dang iba telemtetba agiba ya tanaben asadangshitsü aser telemtetba benoktsü aliba mapang densema ken o dak sendakba nung osang tejangjaba agütsütsü mepeshia asüingdangogo. India-i küm shia USD billion 7-8 alang item osettem bener arur.



## TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI (OCTOBER) 18, 2023

### Zoramthanga-isa Mizoram len anitsü asü?

- P. Tiamongba Aier

**M**izoram nung November 7, 2023 nü Assembly election agitsü atema political party temi nüboyim tenzüka inyakdang Chief Minister Zoramthanga-i maneni sorkar akümtsüsa takok angutsü asü mangutsü ta nisungtemi tenük yoka repranger. Mizoram nung dang masü saka linük nung Zoramthanga ya nungtugu Chief Minister tem aser public lennirtem rongnung ka lir. Tesüiba küm pungu tsüngda Zoramthanga-i aiben Centre tetuyuba sülen manidaki aruogo aser iba ajanga nisungtemi pa tali meteta aküm. Zoramthanga-i aniba Mizo National Front (MNF) ya National Democratic Alliance (NDA) nung teyariteper ka lir saka pai Centre nung Bharatiya Janata Party (BJP)-i aniba sorkar tashi mangai aiben aruogo. 2021 küm Myanmar nungi refugee tebilemtsü khuret ajurudang Zoramthanga-i Mizoram nung Myanmar nunger aika jenokdakja yaria liasü. Iba mapang BJP-i aniba Centre sorkaribo Myanmar refugee tem magizüksü tetuyuba agütsü saka Zoramthanga-i iba tashi manga. Ano, pai aniba sorkarisa Myanmar refugee tem biometric data agitsü memulung. Taküm Manipur nung Kuki-Zo aser Meitei kintem tsüngda rara adoker arudang Mizoram-i iba khuret lemsatepa arudar. Mizoram-i Kuki-Zo nunger nem tenla agütsür aser Zoramthanga-i Manipur tensa atema otiotia jembiba ajanga social media nung nisungtemi pa aitsü aser Manipur nungi telok aser kija karibo pa dang tebang maittsü shia liasü. Zoramthanga ya indangindanga jembiba nisung ka lir aser 2020 COVID-19 mapang Prime Minister-i Chief Minister tem den senden amendang pai kecha mangatet kechiyong pai Hindi mangateter ta ashi. Ano, sentong ka nung Zoramthanga-i Chief Justice DY Chandrachud majitet aser idangji pai Chandrachud ji CJI inyaktsü atema kanga tanubor ka ta bilemba shia liasü. Zoramthanga-i mozü kidang tangar den külemi tarensena noktaker aser rally nunga public den külemi jajar. Mizoram nung chief minister inyaka arur ajaki kümsük ka dang nungi teimba inyaka aruogo. Zoramthanga-ia 1998 aser 2003 nung anaben tashi Chief Minister inyak aser taküm election nung MNF-isa takok ngura pai kümsük pezübuba atema Chief Minister inyaktsü. Arishi küm 79 tain Zoramthanga ya India nung Chief Minister tambusang lir aser kanga dang nungtugu. Ajisüaka Zoramthanga aser pai aniba MNF party anema ken o aika adoka lir. Zoramthanga-i tejak repranga inyaksangshir ta nisungtemi aitsür. Pai par kinunger aser pa den yariteperitem nem maongka agütsür, ochimashi inyaker aser tim mesüi tashi amshir ta asüba onüktem adoka jembir. Külen, Mizoram nung opposition party Zoram People's Movement (ZPM) kanga tashi itta kümogo aser taküm election nung jungjunga tokteptsü renema lir. Mizoram nungeri BJP magizüker aser tan assembly nung BJP MLA ka dang liasü saka MNF MLA ana BJP nung züngsem kümer taruba election nung tokteptsü terenemba lir. Talisa Mizoram nung Congress züngdoktsü makok kechiyong Mizoram state anguba ya Congress ajanga liasü aser tesüiba nung Congress-i küm aika sorkar yimsü süa aruogo. Anungji taküm assembly election nung Zoramthanga aser pai aniba MNF party-i sorkar akümtsü merangba nung tayongzükba jenti ajurutsü aser opposition party tem loktepra parnoki tamakok angutsü ana nung lir.

## OLEMSABANG

### LENNIR-i AIBELNRA LINÜK ASER NÜBUR DANGI TEMERENSHI ARUR

- L.Kika pongener.

Laishiba nung züngra, Israel kin otsü nunga, lennir-i aibelenba meji, linuk aser nübur dangi atakadem temerenshi aruba angur. Tsüngremi Abraham dak kanga temulong lemtet, aser pa kin jenti tebu kümdaktsütsü ta nangzük. Ajisuaka, Abraham dak nungi nutsüng rena aotsüsa senmanger jabaso maliasü. Aji oda, mimchir tsütsü nungibo, Tsüngremi Abraham dang nangzükba ama, kin jenti tebu akümtsübaji teimla mali-asü. Anungji Abraham o kinungtsü nati tena sasa sentong ka atong, aser par kidang kilitsür Hagar ajanga jabaso Ishmael aso. Aser Ishmael ajanga, Abraham kin jenti tebu akümtsü ta bilem, saka aji Tsüngremi nangzükba senmangtsüba jabasoji masü liasü. Anungji Tsüngrem sentong anema inyakba mapa ka liasü. Tsüngremi pai nangzükba kodanga meyzür, aser Tsüngrem tsüngdang tamakoktsü kecha mali asünung, mapang tetemsu nung jabaso Isak moatsü. Ajisuaka, kodang Isak tain aküm, Ishmael o Isak na meputepi aküm, aser iba meji Abraham'er kibong nung mepetmesu adok. Anungji Ishmael kidang nungi aritoktsüsa aküm, kechiyong Tsüngrem anema inyakba mapa nungji timtem ajurutsübasä. Abraham-i aibelenba meji, par jabaso Ishmael o Isak na tsüngda tsükchiteptsüsa aküm. Abraham'er atepzüng nung temenen tera tenzükba agi, pa dak jakzükba Israel kin aser Muslim kintem tsüngda tsükchiteper aser tanü-a raradagi...Aser 'United Nation Organisation' (UNO) aser alima kin ajunga tekolak menudaktsür.

Dawid chubai pa yimli nung nutsüng yongsuk züngdangtsü mulongtet, aser par tongtipurtem nem pa yimli ajunga nung nutsüng yongsuk züngdangtsü ozüng agütsü. Ajisuaka, iba mapa jagi Tsüngrem kanga jashidaktsü, kechiyong aji Tsüngremi memulongba mapa ka liasü. Anungji Tsüngremi Dawid-i aibelenba meji, Israel nüburtem merenshitsü mulongtet. Ajisuaka, Dawid-i Tsüngrem dang tatok nangzükba agi temerenshi asem rongnung ka shimtetang ta ashi. Mezüngbuba nung, Israel linuk nung küm asem ayawara. Tanabuba nung, Dawid chuba tsükchir tsüngdang jenshia ita asem senzütsü. Tasembuba nung, par linuk dangi anogo asem tashitak wara yoktsü. Dawid-i anogo asem par linuk nung tashitak wara yoktsübaji shimtet. Anungji anogo asem Israel linuk nung tashitak wara yoka, Israel nunger nisung meyi neter (70) tashi sudaktsü. Dawid chubai Tsüngrem anema aibelenba meji, pa yimli nung par nübur meyi neter tashi taküm samadaktsü. Atangji, lennir-i aibelenra, pei taküm/kibong dangi dang masü, saka linuk/nübur ajunga dangi atakadem temerenshi arur...ta iba otsü nungji angur. Loktiliba ajak nung lennirtem atema iba ya tansutsü lesson ka lir. Anungji loktiliba ajak nung lennirtemi kechi ken o telemtetba agidir agiaka/kechi mapa inyakdir inyakaka ...Kanga junga shisadanger dang telemtetba agitsüla aser inyaktsüla.

Lipokdang nungi tanü tashi, mimchir sobaliba-a arudang, tatalokba otsüji reprangdangra, mimchiri ambangyima, merumeroa, ngasangadema, mezümeküma, asüküma, pei tashi dak, pei takaba rongsen dak, nutsüng-nubu dak temulong lemer, tashiyim agi mapa tamajung inyakteper. Konang-nungsang bushidang, pei temeden bushidang, mezüngbur, tamabur, tambu, tuluba...ta raktepdang...Ochiba paitoker, ochi mimbanga ayur aser chuba menden raktepdang nisung tepsettsüa mapayur. Lennir aika rongsen/supokrem agi tenuk poka-doker, senyong pei temeden ayoker, senyong pei tenzükba menden yokshir. Lokti nung lennir karibo pei nukjidong ataloktsü arishidang, ochi ajembanger aser tsüngsu-mong maka kümdaktsür. Aji oda, alima/nübur tsüngdangbo shidak/temeden ama asütsü akok, saka Tsüngrem tsüngdang memedenra, pei taküm/kibong dangi dang masü, saka linuk/nübur ajunga dangi temerenshi arutsü. Tsüngrem o-i ashir... "Nisung tsüngdang shidak mesukba lenmang ka lir; saka iba tatempangji tasüba lenmang" (A.Shin-16:25). "Tamajunger linuk nungi leptoktsü; aser ashikülaker tera nungi attsütoktsü" (A.Shin-2:22). Shirnoki ashikülaka ochi mimbanga ayur, parnokjibo tera dena atsüdoktsü...ta ashir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Blasphemy ozüng agi Pakistan Khristanpur tim atemer

**Islamabad, Mongputeni/Oct. 17 (Agencies):** Pakistan nung Khristanpuri Islam tamangba yimsü mezüngmeshi ta tai tongloksüba tang tali akumer, talisa Sweden nung January ita Quran rondoktsüba sülen tali ataloker.

Sweden nung Quran rondoktsüba tushia tamangba yimsü mezüngmeshi ta tai tongloksüba indang ken o densema lir. Iba tatalokba dak sendakba nung Pakistan nung tesem kar nung alirtem ain adokba police-i aziüktet, saka Khristan kibong, kiyong aser tekülem ki dak tenük yoker tawa telok balalai timtem agütsübabo junga menokdangtet.

August 16, 2023 nü Jaranwala, Faisalabad, Pakistan nung adianu anati Holy Quran shisa aser tamangba yimsü mezüngmeshi ta tai tongloksü. Iba tai tongloksüba ya kanga kera tensa tamajungba kuma tekülem ki 20 dak tema aser ki aika raksaja liasü.

Iba ya ajanga Pakistan nung aliba Khristanpur tetsübo nung alir aser southern Punjab nung aliba Khristanpur lokti-i obendang agütsütsü amokmerener, tiazü nung tai tongloksür, police temi apur, arogopur aser lenirtem tetsübo nung alir.

Jaranwala nung atalokba ajanga tamangba yimsü

mezüngmeshiogo ta tai tongloksüba yimya tali akumer aser Khristanpur shisaboloa alir. Iba ya ataloker anogo tenet tsüngta ano tamangba yimsü mezüngmeshi ta tai tongloksüba ken o asem adoka Pakistan nung Khristanpur shisabolor.

Jaranwala nung ki o jen raksatsüba sülen Sahiwal nung arishi küm 27 tain Ehsaan Shan Masih-i TikTok nung tamangba yimsü mezüngmeshia noksa inok ta August 20 nü tai tongloksüba liasü.

August 21 nü Madina Town, Faisalabad nung tamanger ka aliba ki anasa Quran kaket shisar aliba ngua iba kaket shisaba asoshi par dak tai tongloksütsü tsüboa liasü. Kasa anogo Sargodha nunga mosque ka anasa Quran rongsar aliba ka ngua yimtsüng nung aliba Khristanpur takum lendong nung alir.

August 24 nü Rawalpindi nung Khristanpur aliba kiyong ka nung tamangba yimsü mezüngmeshiba oluli temai adoka parnok meindoktsü akok ta tsübotepa liasü.

Ano August 25 nü Sargodha nung Quran tapak kar arongba osang prokshia liasü. Iba osang ya mejangjaba nisung kar anema benok. Mochipura nung tamanger mürekmeju mapa inyaker kibong kati tiazü nung tai tongloksü aser iba tetsübo parnok jena ao aser police tem

arua tensa aziüoka liasü.

September 3 nü Jaranwala kübok arogo ka indang pastor Eleazer Sindhu lenmang nung lia anendaktsü. Pa dak prangbong agi tuitar tamangba yimsü melentsü amokmeren, saka pai memolung aser Laishiba tekongtem azüng tenzük. Pa dak injang khaloktsü saka tia kaa takum kumzük.

Pakistan nung mapang talangka nungi blasphemy laws meshidaki amshiba otsü lir, koba Pakistan nung tamangba yimsü akang-akanga amanger aser secular tsüngta atsütepa arur. Iba ozüng ya British nung mapang nungi amshia arur, aser iba ozüng kübok Prophet Mohammad, par kibong aser külemi alirtem mezüngmeshiba ama angatetba densema tasüba agi merenshir mesüra arishi tepiyong tepuokdak ayur.

Ajisüaka iba ozüng ya meshidaki amshia tamangba yimsü tsütsü kin tilatem reshikangshia amshir, pei ajangzüktsü asoshi amshir. Item ozüng dak sendakba nung küm ishika tsüngta blasphemy ken o tali akum aser iba yongji nisung 100 dak tema takum sama.

Iba ozüng mechi tetsür aser tanurtem timba tim atemer, kong parnok kidang nungi anizüka merenshir mesüra school nung mejungi amshir.

## ANOGO ABEN TSÜNGREM DEN

### Jilia Reprangba

T.Ken 142: 1-7

Shingaia ongen nung meliner. Dawid Saul nungi jenshia lungpok nung okronga alidang iba ken zülu. Pa okronga aliba mapang, pai tetuyuba pezüsü nungi reprang.

Mezüngbuba, Dawidi telunglen reprang. "Kibuba dang kü ola agi ayimtener; ni Kibuba dang ola tulu agi mepishi. Ni Pa madang temulung masüba sayur; ni Pa madang kü timtem sayur. Kodang kü nela lular Nai kü lemanng metetter. Ni jajatsüba lemanng nung parnok ni asoshi sang sua yutsü" (t.1-3). Pai telunglen reprang aser ashi, "Reprangang, ni timtem nung lir; ni ayimtener; ni lulaa lir". Telungi ia reprangbaji khenkhen na asoshi tajung, saka iba nung mapang kanga teindok, mesüra na tasü meiti akümstsü akok.

Idangji Dawidi temeket reprang aser teyari angutsü yimla. "Kü teka tachichi reprangang, aser ajiang, kechiyong ni metetter nisung shinga mali: tejenokdak ni mali, nisung shiangaia kü nela asoshi mebilemstsü" (t.4). Nai yamaji bilemer asü? Nai meküta repranger aser ashi, "Shingai meyarira - ajaki pei-pe khuret abener, aser shingai kü khuret lemsateptsü memelunger". Ashiko iba tia nung nai tangar khuret asoshi bilemstsü nung parnok ni bilemstsüba nung jangra atemstsü.

Telunglen aser temeket repranger kecha teimla mangu nung, Dawidi temalen reprang. "Ni ne dang ayimtener, O Kibuba; ni ashi, Na kü jenokdak, akümüli nung Na kü shilem" (t.5). O tanga ka nung Tsüngrem, Nai kü tayimtenba angashitsü. Nai ni rishikangshir nungi kümzüktsü, parnok kü dang nungi tashi taitba lir.

## UP Pentecostal mission center raksatsü, pastor densema nisung 18 apu

**Bhulandih, Mongputeni/Oct. 17 (Agencies):** Uttar Pradesh state nung Hindu nationalist sorkar ketdangsür temi Pentecostal mission center ka raksatsü aser nisung 18 apu, ta osang kar ajanga ashir.

Iba center ya Jaunpur district kübok Bhulandih area nung taoba Bodhbarnü raksaja liasü, ta Union of Catholic Asia News ajanga ashi. Special police squad kati Jeevan Jyoti Church mission center ya raksatsü, aser iba mission center leni aruba lenmangtem shibangtsü. Iba mission center ya lapoker küm ter dak tema arur.

Pastor Durga Prasad Yadav densema nisung 18 apu.

Yadav, pa kinungtsü Leela aser tenu Jai Prakash nung temi mapa tamajung inyaktüsü tasa yanglu ta aitsü. Iba tesem raksatsütsü anogo an alia Yadav, pa kinungtsü, jabaso Manish aser Mirzapur nungi pastor Sanjay Masih aser Christian forum Rashtriya Isai Mahasangh indang UP tir Manoj Jacob nungertem apu, ta The Wire ajanga ashi.

The Wire ajanga ashiba agi, police temi Yadav anema UP Prevention of Unlawful Conversion of Religion Act

kübok ken o ka benoka lir.

Sorkar li nung ozüng alema ki o jen yanglua aliba raksatsütsü nukjidong nung iba maparen ya inyaker, ta sorkar ketdangsür Neha Mishra-i ashi. Iba mission center lapoktsü ya ketdangsür nungi temelaba mali ta lai ashi.

Ajisüaka arogo ketdangsür kati Neha Mishra-i ashiba aitsü aser center ya tuluba sorkar li nung masü saka campus shilem kabo liasü, ta ashi.

"Yangji aliba ketdangsür nungi temelaba agir jara yanglu, saka temelaba ya tezüluba nung masü tepang o dang lir," ta arogo ketdangsüri ashi.

Mejangjaba nisung kari arütsü nung jara yanglua aliba ya October 5 nü raksatsü, ta arogo ketdangsür kati ashi.

Iba sülen sorkari mission center dang iba tesem raksaba nung indokba sen lakh asem jungnüa menoktsü totuyuba agütsü, ta osang ajanga ashir.

Yangji aliba sorkar ketdangsür temi September ita prayer center indang ketdangsürtem anema First Information Report (FIR) asem benoka liasü, ta The Wire ajanga ashi. Iba tesem ya leper asoshi latetja liasü, saka ozüng alema

agi aser prayer center ya yanglu ta report nung shia lir.

"Ozüng agi melaba aser kurila meyong ali nung mokongshi," ta Deputy Superintendent of Police Gaurav Sharma-i The Wire dang ashi.

Iba center shilem ka sorkar li nung liaka administration ajanga compound tezülen aliba ali den melentepeteta liasü, ta osang ajanga ashi.

Uttar Pradesh nung 2021 küm anti-conversion law benokba sülen Khristanpur anisüngzüka meliteter.

"Khristanpuri sarasadem sentong ayongzükba sorkari maginer," ta Pastor Dinesh Kumar-i UCA News dang ashi.

Iba ozüng nung aibelen ta tai tongloksüba tang Uttar Pradesh nung tamanger 89 tepuokdak lir ta UCA News ajanga ashir.

Uttar Pradesh nung aruya aliba state elections mechi Hindu nationalist political leaders tem temolung ulushir, ta US nung amenoka aliba International Christian Concern ajanga ashir.

Khristanpur tali tepuokdak ayuba ya iba anti-conversion laws ajanga lir ta ICC ajanga

taoba hopta shia liasü aser 2020 küm tatemlen nungi tenzuka item ozüng mechi Khristanpur 400 jungnüa tepuokdaki yok ta ashi. Tamanger dak timtem agütsüba tali akumer aser kidang adenshia alirtem daka tenük yoker.

India nung state ter dak tema nung anti-conversion laws benoka amshir. Hindu nungertem tamangba yimsü melentsü asoshi Khristanpur aser Muslim nungeri tashiyim amshiba mesüra sen aser osettsüset agütsüba nokdangtsü mechi iba ozüng ya nüngdaker ta ozüng bhukumer temi ashir.

Item ozüng kübok tashiyim amshia, mesüzüka aser ashikülak yimya amshia, kiyimba ajanga tamangba yimsü melendaktsüba nokdangter. Hindu nationalist activists aser telok balalai tamangba yimsü tsütsü nütsüng tajemba alirtem anema item ozüng ya amshia tai tongloksür.

Taküm August ita tashinung Uttar Pradesh kisüng nung Khristanpur anema mapa tamajung inyakba 104 liasü, ta United Christian Forum ajanga ashir. Linük ajanga nung iba

ama tatalokba 525 ajunger. Iba state nütsüng yongsük million 200 aliba nung Khristanpur shilem 0.18 dang lir.

India nütsüng yongsük shilem 2.3 dang Khristanpur lir, ta US State Department ajanga ashir.

2014 küm nungi tenzuka Khristanpur anema azüdokshiba tali akumer ta UCF ajanga ashi. 2021 aser 2022 nung tali liasü aser 2021 ya India nung Khristanpur asoshi tamajungtiba küm liasü ta parnok ni bushitet.

Tamangba yimsü ajanga amshir tem densema 'vigilante mobs' temi Khristanpur dak tenük yoker. Tamangertem reshikangshia aser merenshia amshir nem temerenshi magütsüba ajanga yamaji ataloker aser tashiyim amshia tamangba yimsü melendaktsür ta police dangi ken o abener, ta UCF report ajanga ashi.

Open Doors ajanga alima nung Khristanpur alitsü asoshi linük tamajungtiba asadanga 2023 World Watch List nung India ya jenjang 11 buba nung lir. Hindu nung ya dang India nung chichiba ta angatetba ajanga tamangba yimsü tsütsü temeden samar.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Saok**

(v) tango tamajung menemokba (inhale bad odors)

\* Gari zükne saokba agi tokolak angor.

**Sapisayang**

(v) sentong bilemdanga yangluba ( thoughtful planning)

\* Taküm küm Khristmas benjong amongtsü sapisayang tenzükogo.

**OLONG PAITEP # 6670**

1		2				3		4		5
				6						
	7		8							
9					10			11	12	
			13		14	15				
16					17			18		
					19	20				
21		22								23
24										

**TIPIEN**

- 1. Saku - (4)
- 6. Songjen - (7)
- 7. Mali/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. --- tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6669 TELANGZÜBA**

**TIPIEN :**

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.



**DEOBAR NÜ SENTEP OSANG :**

**Pokraba :** Temba nibo koda masü maruteta, tanüa Pastorbai topic tajung jembia ta ahar ato, kechi onük jembia?

**Alokba :** Aeee, niji oda tesüngmangtsü ka anünüji to, khen züshia arudang Kainba o Abelba na mepet-mesü indang jembia liahako, tanaben züshia arudang Yisui nisung merijang kwiarka ango ana ahemarka den amtsük pungo-terok ka agi peria lemer ano molok kwiarka anünga ta shiya liahajai.

**Pokraba :** Oh Alokba!!

~ Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Himanta Sarma-i Northeast sobaliba raksatsür: Rahul Gandhi**

**Aizawl, October 17, 2023 (Agencies):** Congress MP Rahul Gandhi-i Mizoram semdangi arua lir aser tanü Aizawl nung osangbener den jembidang BJP aitsü.

"BJP-i regional party tem amshia state tem raksatsür" ta Rahul-i ashi.

Assam Chief Minister Himanta Biswa Sarma-i sobaliba anema inyaker aser pai Northeast sobaliba samatsür, ta paisa ashi.

BJP-i parnok alizüng atongtsü atema regional party tem amshir. BJP aser Rashtriya Swayamsevak Sangh (RSS) indang alizüng balaka lir aser parnoki INDIA tangatetba samatsür, ta Rahul-isa metetdaksü.

"Congress indang alizüng jibo decentralisation lir saka BJP



**Rahul Gandhi**

indang alizüngbo centre nungi yimsü asütsü aser lemtet ajak centre nungi agitsüba lir. RSS-i nenok tamangba yimsü tamendakdak, oshitem amaker. RSS-i linük ya tangatetba ka ajanga dang yimsü asütsüla ta bilemer. Onokibo Mizoram nung alirtem Delhi nungi masü saka pei sasa yimsü süa odaktsünür" ta paisa metetdaksü.

"Congress sorkar kümra

onoki policy tem mapa küma inyaktsü. Rajasthan health model ama state aika nung onoki takok anguba model aika tenzükogo aser itemji tanga state tem nunga inyaknür" ta Rahul-isa shisem.

"Manipur nung BJP-i local party tem anir makogo" ta Prime Minister Modi-i Manipur mesemdangba indang olen ka Rahul-isa ashi.

"BJP-i northeast nung meinprong adokdaksütsü atema regional party tem amshia. BJP-i kü membership, kü ki agiogo aser ni anema ken o 25 benoka lir. Onoki oziung nung ajemdaker tokteper. BJP ya Mizoram atema lendong lir, RSS ya INDIA atema lendong lir. Nü vote ajanga BJP nem tashi tagütsü kechiyong tarutsü nung timtem jenti ajurutsü" ta Rahul Gandhi-isa ayongzük.

**KLO (KN)-i yimjung olemtep magizüker; Kamatapur meshir**

**Guwahati, October 17, 2023 (Agencies):** Kamatapur Liberation Organisation indang Koch Nationalism (KLO-KN) teloki sorkar den yimjung olemtep nung shilem magitsü ta shiogo.

Taoba KLO tanishir Jeevan Singha Koch-i aniba teloki sorkar den olemtep tenzükba nung onok madener aser 'Independent Kamatapur' atema maneni raratsü kechiyong onok Indian Union nung maden ta KLO-KN-i metetdaksüogo.

"Kamatapur ya kodanga India nung maden aser Kamatapur nung ya India nung masü. India-i tashiyim agi Kamatapur agi aser onok nem tashiyim agi Indian maitsü agütsü saka onoki ibaji kodanga magizüker. 1947 sülen India-i tashiyim agi Kochbihar (Kamatapur) merger agreement ta ser Kamatapur atsünga agi" ta KLO-i sangdong ka nung metetdaksü. Kamatapur nung India sepaitemi meimchir temeten anema inyaker aser tanü

Kamatapur nung lisopurtem pei ali mali kümogo" ta parnokisa metetdaksü.

Iba sülen nungi India sorkari Kamatapur nung lisopurtem madak yimsü süa arur.

"Iba jagi December 28, 1993 nü Kamatapur Liberation Organisation tentet. January 17, 2023 KLO priesdent Jeevan Singh Koch-i yimjung olemtep atema India-i ogo saka onoki iba nung shilem magir. KLO indang Constitution nung independent Kamatapur indang lateta lir" ta KLO-KN-isa ashi.

**Khasi ya Meghalaya official language akümstsüla: KAS**

**Guwahati, October 17, 2023 (Agencies):** Khasi Authors' Society (KAS)-i Chief Minister Conrad Sangma den senden ka amendang Meghalaya nung Khasi ya official language kümdaktsütsü ayongzük.

Meghalaya Language Act, 2005 kübok tang Meghalaya nung official language ji English aser Khasi o Garo ji associate official languages ama benshir.

"Onoki sorkar dang Meghalaya nung Khasi ka

official language kümdaktsütsü shidangogo kechiyong associate official language ka dang lir" ta KAS President, DRL Nonglait-i osangbener dang ashi.

"Kodaser ozü tetsü oshi ka associate language asütsü? Onoki Chief Minister dang Meghalaya Language Act, 2005 nung temelenshi kar asütsü shiogo" ta paisa ashi.

Garo-a official language ama amshitetsü kechiyong

official languages ana amshiba nung kecha timtem mali, ta Nonglait-isa shisem.

CM Conrad-ia bangdak department dang Act osang tejangja metettsü tetuyuba agütsüts shiogo ta KAS President-isa metetdaksü.

KAS-isa CM Conrad dang Union Home Minister dang taruba Parliament session nung Eighth Schedule nung Khasi dendaktsütsü atema bill ka benoktsü ayongzük.

**GOVERNMENT OF NAGALAND  
DIRECTORATE OF A.H & VETERINARY SERVICES  
NAGALAND:: KOHIMA  
ADVERTISEMENT**

**NO.VET/EST-3/KMA/1/Pt-1/2022-23/**

**Kohima Dt. the Oct'2023**

In compliance to the Hon'ble Gauhati High Court Kohima Bench judgement order Dated 24-07-2023 W.P(C) NO.64/2016 (Shri. MhalevizoThevo - Vrs - State of Nagaland &Ors) applications are hereby invited from indigenous inhabitants of Kohima District for 1 (One) post of MTS at VHC Chakhabama, in pay Matrix Level-I, under the establishment of Chief Veterinary Officer, Kohima, Department of A.H. & Veterinary Services, Nagaland, Kohima.

**Terms & conditions**

- (1) Educational qualification: Highest class read should be indicated (along with all supporting Documents i.e. ST/Indigenous/ Birth Certificate class 10 Admit Card/ Aadhar/ 2 Nos of recent passport photos)
- (2) Age limit: The candidates should not be less than 18 years or more than 35 years of age. However in view of the Hon'ble High Court directive the write petitioner and private respondent No-5 in WP (C) NO 64/2016 shall be exempted from this age limit for this particular interview.
- (3) The application should be addressed to the Director of A.H & Veterinary Services Kohima 797001
- (4) Last date of receipt of applications shall be on 26th Oct' 2023.
- (5) Submission of incomplete documents shall be summarily rejected.
- (6) Preference shall be given to the indigenous inhabitants of Kohima District.
- (7) Admit Card shall be issued on 30/10/23.
- (8) Interview shall be conducted on 31/10/23.

Sd/-

**DR. NSANTHUNG EZUNG  
DIRECTOR OF A.H & VETERINARY SERVICES  
NAGALAND:: KOHIMA**



Viet Nam-India Joint Commission for Economic, Trade, Science and Technology senden 18 buba Ha Nai, Vietnam nung adentsü aodang Vietnam Minister of Foreign Affairs, Bui Thanh Son-i Indian External Affairs Minister S Jaishankar agizükba noksa nung angur.

### Putin aser Hungary PM Orban na ajurutep

**Budapest, Mongputeni/October 17 (Agencies):** Russia tir Vladimir Putin aser Hungary Ato Kilonser Viktor Orban nati Beijing nung international forum ka metenzük tsüingda linük ana tsüingda tesendaktep tali akangshio go aser ashiba agi, Ukraine nung rara ajanga tensa mejungi liaka iba ajanga linük ana tesendaktep dak mekongshir.

"Tensa mejungi aliba mapang ka nung tesendaktep yanglutsü atema kanga ajema kümogo, ajisüaka Europe nung linük aika den tensendaktep maneni yutetba atema temulung asür aser linüktem rongnung Hungary-a ka lir," ta Putin-i ashi.

Hungary ya European Union aser NATO züingsem ka lir saka parnok Moscow den tesendaktep tajung aliba ajanga Ukraine nung rara mapang parnok tendangdar.

Russia-i Ukraine amak

tenzükba sülen Budapest-i par litsü ajanga Ukraine-i prangbong injangtem bener maotsü asoshi tenokdangba agütsüogo aser EU-i Russia nungi totzü belener aoba dak sendakba nung tenokdangba agütsür liaka Moscow den energy dak sendakba nung tesendaktep akangshio go.

Ukraine EU nung adentsü merangba mapang Budapest-i tongtibang shilem ka agitsü imlar. December ita vote agiteptsü lir aser iba mapang Hungry-i Ukraine EU nung medemdaktsütsü atema nokdaksü akok.

Temzüing özüing nung aibelenba atema Hungary nem tenokdangba agütsür lir ajisüaka Ukraine dak sendakba nung vote agiteptsü lia parnok atsüa arutsü atema EU-i Hungry nem USD billion aika chiotsü asadangdar, kechiyong züingsem ajaki mulunga agizüknungdang

züingsem tasen bendenloktetsü. Russia den energy dak sendakba nung tesendaktep akangshitsü atema Beijing summit ya maongka ka ama Hungry-i agitsü imlar. Hungry-i linük nung amshiba gas shilem 80 bo Russia nungi abener.

Putin aser Orban na senden amenba mapang gas aser oil shipments aser nuclear energy ken o tem benoka sensaksemogo, ta Orban indang press chief Bertalan Havasi-i Reuters news agency dang ashi.

Orban-isa, Russia nem tenokdangba agütsür aliba agintsü aser Ukraine nung rara anentsü nüngdakba lemsatepogo.

Lenir ana ya tang China's Belt and Road Initiative 10buba anniversary nung Southeast Asia aser Africa nungi lenirtem den Beijing nung summit ka nung shilem agidar.

### Israel-i southern Gaza nung bomb pokloktsü, nisung 70 dak tema asü

**Khan Younis, Mongputeni/Oct. 17 (Agencies):** Israel-i Gaza nung Khan Younis, Rafah aser Deir el-Balah tesemtem nung tayimtsü amshia amakdang nisung 70 dak tema pei kidang tepset, ta tesem ajungalen lungbanger aliba Gaza indang Ministry of Health ajanga ashi.

Gaza nung yimsü asüba Hamas telungpuri Israel south tsütsü amakba tayang kepzüük tenzüker anogo ter shi ajungdang Mongulbar aonung item nisungtem asüba osang ya angazüker.

October 7 nungi tenzükba iba azüdokshi ajanga Israel nung nisung 1,400 shi aser Gaza nung nisung 3,000 dak tema takum samaogo.

Tang testüsa Israel-i tayimtsü amshia amakdang asürtem ya timba Israel-i tuyuba ama Gaza City asr Gaza Strip idang north len nungi aortem lir, ta Gaza nung osangbener kati ashi.

"Ambulance tem nung yirur alirtem bener nisung agi sünga aliba mozüki bushia aor, aser ano nisung aika ki raksaba agi nangbanga lir aser tekumzüker

atateper ta onok dang ashi," ta osangbeneri ashi.

Khan Younis nung Nasser Hospital jakdang Emergency Medical Services nung inyaker kati, "Israel-i tanurdak tenük yoker amaker," ta osangbener dang ashi.

"Onok ajak mejanga liasü aser anü madokdang sarasademtsü asoshi onok anepdang yakta sak. Iba sülen onok nisung 40 aliba ki nung amak," ta nisung kati ashi.

"Ajungbena kiyong ajunga raksar liasü. Ni müketa nisung tasü mang agi sünga lir," ta pai ashi.

Gaza Strip nung Palestine nung tepsetba 3,000 jungogo, ta health ministry ajanga ashi.

Tzükum anasa aliba iba alinük tilaka nungya nisung 12,500 dak tema yirua lir, ta ministry ajangasa ashi.

Occupied West Bank nung Palestine nung 61 tepset aser 1,250 dak tema yirua lir.

Hamas kiralongrar teloki ashiba agi, tang Gaza Strip nung hostages 200-250 tsüingta lir aser Gaza nunga 200 lir. Par teloki bendanger 200 shi pua lir aser

ano danga kiralongrar telokia 50 shi pua lir, ta Hamas odongtar Abu Obeida-i Hombarnü video ka nung ashi.


"Pua alirtem jangjatepba mapang karbo danga linük nungi liasü. Anungji parnok ya tepuokdak alirtem masü saka Gaza nung 'guests' lir aser tekeratiba nung chioktsü," ta Abu Obeida-i ashi.

### 'Muslim nunger, Resistance Forces nokdangtsü makoktsü': Khamenei

**Tehran, Mongputeni/October 17 (Agencies):** Iran lenir Ayatollah Ali Khamenei-i Mongolbarnü ashiba agi, Israel-i Gaza nung özüing alema parnok inyakyim manenra alima nung aliba muslim nungertem aser resistance forces nokdangtsü makoktsü.

"Zionist regime-i Palestine nung özüing alema parnok inyakyim manenra shingai Muslim nunger aser resistance forces den tokteptsü makoktsü. Gaza nung bomb pokloktsüba tangsa tang anentsüla," ta Khamenei-i ashiba Iranian news agencies-i metetdaksü. "Gaza nung Palestine

### MULUNGNEN O



**ASO :** 03/08/1944 **ASÜ :** 15/10/2023

Asür Mrs. Alemrangla Jamir (Longmisa), la shirangba mapang aser iba lima nungi pilaba anogo tashi adianutem, tembartem, kiyongertem aser temeimertem shirnokisa ozü asüko mangyim mapang shisatsü aser rongsen ajanga yariogo, nenok ajak dang kanga pelaba lemsateper.

Nenok temeim aser teyari onoki kodanga mamatoktsü. Tsüingremi nenok mojangma.

*~ Adianu, Jalatem, Semchirtem aser Kinüingertem.*

### MOLUNGNEN O



Onoki teti meima aliba asur Obala Lanumeren Longchar. (Waromong) Alongkima. Oct 11, 2023 anogo teti anisüngzük limai ogo. Onok mangyim tia nung alidang kija, kibong, arogo, lokti shirnokisa sarasadem den nübo rongsen agi nungita yaritepogo nenok ajak dangi tsüingtom marutet nung iba osang ajanga onok pelaba nenok den lemsateper. Asen tulusang Tsüingremi ajak moajangma.

*- Chirnurtem, Kinungertem aser Semchirtem*

**ASO : 30/08/1930**  
**ASÜ : 11/10/2023**

### JANGJASHITSÜR

Date 9<sup>th</sup> Aug. 2023 anogo Tir Yimiyim adok nung Late Rongsennungba jabaso Mr. Alemtemjen Akhoya, jala Kimazungla kinunger nungi jendoker ta sangdonga alibaji Date 16<sup>th</sup> Oct. 2023 anogo kinunger-i la jaoka ken o ajak angatettepa jembiteper tanü nungi kinunger züingsem ka ama alitsü sangdonger.

**Sd/-**

1. Imsütoshi
2. Olemjungba
3. Temjenmenba

**EMPLOYEES' STATE INSURANCE CORPORATION**  
**REGIONAL OFFICE: N.E. REGION: GUWAHATI**  
**BAMUNIMAIDAM, GUWAHATI-781021 (ASSAM)**

**mIMP Scheme kübok ESIC nung zülüoktsü asoshi Private Practitioners, Local Chemist aser Local Diagnostic Centre nungi online application meshir**

ESIC Regional office, Guwahati ajanga mIMP Scheme kübok ESIC nung zülüoktsü asoshi Nagaland state atema District Headquarters 1. Dimapur 2. Kohima 3. Mokokchung 4. Kiphire 5. Longleng 6. Mon 7. Noklak 8. Peren 9. Phek 10. Tuensang 11. Wokha 12. Zunheboto 13. Chumoukedima 14. Niuland 15. Tseminyu nungi Private Practitioners, Local chemist aser Local Diagnostic Centre nungi online application meshir.

**Online application ya 27.10.2023 tashinung agütsütsüla.** Metetbelatsü asoshi ESIC Regional Office, Guwahati den tongtepratepang. Address: Panchdeep Bhawan, ESIC Regional Office, Bamunimaidam, Guwahati-781021 Email: rd-assam@esic.nic.in.

\* Advertisement tejangja atema website <https://www.esic.gov.in/tenders> nung Console number 10743/2023 amshia bushitetsü.

**Regional Director (I/c)**  
**ESIC R.O., Guwahati**

CBC 23123/12/0008/2324

nunger anema inyakba atema agi, yimden yimsüsüba tsütsü Zionist regime ketdangsurtem ken o bentettsü atema obendangtsüla," ta paisa ashi.

Iran foreign minister Israel-i Gaza maneni makra Hossein Amirabdollahian-i, jenjang mashi ka agitsü akok. "Tsükchir den mapang talang ka raratsü atema resistance front dak tashi lir aser tang mangatettep adoker aliba atsülanga ora Israel indang map melenshitsü," ta Amirabdollahian-i shisem.

"Hezbollah-i lenla ajak kanga junga asadangogo aser resistance lenirtemi parnok aliba tesem nung Israel nem jenjang kecha magidaktsütsü. Mapang mashi ka nung jenjang tapet agitsü akok," ta Amirabdollahian-i ashi.

Foreign minister-i ashiba renemshiba mapang ka lir.

## Mokokchung nung MDFA Trophy 2023 asayadagi



MDFA Trophy tanü Imkongmeren Sports Complex nung tenzükdang Trophy tenzüksür MLA & General Secretary Nagaland Football Association Benei M. Lamthiu MDFA lenirtem aser tanü mezüngbuba asayar telok ana külemi tangokba noksa.

**Mokokchung, Mongputeni/ October 17 (TYO):** Mokokchung District Football Association-i (MDFA) ayongzükba MDFA Trophy tanü Imkongmeren Sports Complex nung meraketa tenzükgogo.

Tanü iba Trophy tenzükgba mezüngbuba asaya Konyak Students' Union Mokokchung(KSUM) aser Sports Society Soyim(SSS) tsüingda asaya aser iba asaya nung KSUM-i SSS goal 4-2 agi koka tembang.

Tena asayaba mapang nung KSUM nungi Jersey no 11 Khampei-i minute 35 aser minute 60 buba nung goal ana aser ano jersey no 7 Kapzei T-ia minute 39 aser minute 76 nung goal ana yok, SSS telokia kanga dang meranga asaya aser par telok nungia jersey no 8 Shiponglepba-i minute 48 buba nung goal ka yok aser ano SSS telok nungisa Jersey no 10

Shilumayang-i minute 86 buba nung goal ka yok aser iba asaya KSUM-i SSS goal 4-2 agi akok. Telok anaprongi iba asaya akoktsü merangtepdang KSU telok nungi asayar asem aser SSS nungi asayar 2 ta Yellow Card achi.

Tanu iba Trophy tenzüksür MLA & General Secretary Nagaland Football Association Benei M.Lamthiu tayongzükba o tatsüka jembidang Football asayaba ajanga nisung ka yimya memelenshitsür, saka football asayaba ajanga nü dak jakla keta alibaji sayur, anungji football asayartemi azüoka asayatsüla ta ashi.

Paisa asayartem dang Nagaland nung asayaba tesemtemji reprangdangra kanga dang mejungi lir, saka iba nungji temulung majemi asayartemi pei sempet tajungtiba nung amshia asayatsü merangtsüla,

kechiaser Nagaland sorkar aser Nagaland Football Association-i Nagaland nung saisapongba nung renloksü asoshi mapotong aika inyakdar, ta NFA General Secretary-isa asayartem ajungmesoa ashi.

Sentong nung Sunep Lemtur aser Lenen Jamir tenati ken balala tena telok tesentepertem ajungshia asayamung lemladaksü. Tarur pela agizüka Trophy Co-Convenor N.Akok Lkr-i jembia aser tanü sentong aser Trophy tepeyong asoshi Tsüingremer tawabangba jazüka Chang Baptist Church Mokokchung Pastor Ngaku Chollen Chang ajanga sarasadem aser Lanuakum ketdangsüba nung iba sentong agia liasü.

### 18-10-2023 Fixture

12:00 PM ---- Moanungsang MSC Vs Dare Devils(AR)  
2:00 PM ---- Araka United Vs Telongjem SC

## Women's T20 Trophy atema asayartem sangdongogo



**Dimapur, Mongputeni/ October 17 (TYO):** Senior Women's T20 Trophy 2023-24 atema Nagaland Cricket Association-i Senior Women's Squad sangdongogo.

### Team nung asayartem:

1. Limatola Ao (C)
2. Sentimenla Imsong
3. Elina Muru
4. Sariba Khan
5. Alemienla
6. Watinaro Pongen
7. Jyoti Thapa

8. Talirenla Pongen
9. Rwisumwi Basumatari
10. Merensola
11. Zhovelu Chuzho
12. Neikesonuo Rose
13. Yashi Pandey - Guest player
14. Sejal Kiran Raut - Guest player
15. Rohini Mane - Guest player

### Support staff:

1. Limatenzük Amer- Team manager/Asst. coach
2. S K Srivanthi- Head coach
3. Arjun Hoysala - S&C coach

4. Wangshila jamir- Physio

### Fixture:

20th Oct. 2023: Nagaland vs Arunachal VS ARUNACHAL  
22nd Oct. 2023: Nagaland vs Hyderabad  
24TH OCT. 2023: Nagaland vs J&K  
26TH OCT. 2023: Nagaland vs Madhya Pradesh  
30TH OCT. 2023: Nagaland vs Abdhra Pradesh  
Asaya ajak Aaipur nung asayatsü.

## 44buba Kohima Law College asayamung asayadar

**Dimapur, Mongputeni/ October 17 (TYO):** 44buba Kohima Law College Students' Union asayamung Indoor Badminton Stadium, Officer's Hill Kohima nung October 17 nü asayaogo.

Iba asayamung ya "Together into Greater Heights through law & sports" omen nung ajemdaker asayadar.

Asayamung lapokba sentong ya Rhobeni Kikon lenisüba nung agi aser Union tir Vikeduo Kire-i lokti pela agizükba o jembia liasü. Sentong nungsa Chongphe Khamnuigan-i ken ka aten aser Principal N.S Magh-i o jembia.

O jembiba mapang principal-i, sports law/Act mejeta ka meliaka asaya ajak

atema temzüng ozüing lir aser asayartem ajaki item temzüng ozüingtem ya jangja alitsü nungdaker, ta ashi.

Kasa sangdong ajanga ashiba agi, kima nung asayaba asayatem October 18 aser 19 nü New Reserve Police play ground, Phesama nung asayatsü.

Maneni sentong nung kaketshirtem atema mejeta Asst. Prof KLC Tongpok Pongen-i sarasademsü aser iba sülen sports & games secretary-i achaayanga asayartem tenanzüktepbaga agia liasü. Mezüngbuba sentong ya Asst. Professor, Kohima Law College Kezhokhoto Savi-i asayamung tenzüksüba sülen tembanga liasü.

## Zaleo-i Nagaland State Futsal Championship tenzüksüogogo



**Dimapur, Mongputeni/ October 17 (TYO):** Advisor, Urban Development and Municipal Affairs, Zaleo Rio-i Mongolbar aonung JJ Arena Chumoukedima nung tasembuba Nagaland State Futsal Championship 2023 tenzüksüogogo.

Sentong nung o jembiba mapang Zaleo-i ashiba agi, futsal asaya ya alima nung küm 10 tema asaya arudar ajisüka state aser north east nungbo tasen lir.

Paisa, futsal asaya ya tetenzük nungi süoki ia asayara state nungi asayartemi linük nung dang masü saka internation jenjang tashi tongteta asayatetsü, ta ashi. Pai, Naga nung asayartemi iba asaya tajungba asayatsü ta amangba lemsatapa liasü.

Maneni paisa tarutsü nung asayartemi tajungba asayayonga aotsü imla ataba lemsatap, ajita asünungdang Nagaland team linük nung champion akümtsü aser küniibo internation jenjang nung linük

tenüing nungi asayatetsü, ta ashi.

Anogo 4 asayatsü aliba asayamung ya Nagaland Football Association-i ayongzükogogo aser Chumoukedima District Football Association-i achaayanga asayadaki. Ajak senteper iba asayamung nung team 16-i shilem agidar.

Iba asayamung ya club asayamung ka asütsü aser district ajak nungi team kakati shilem agitsü. District kar shilem magiba ajanga Kohima aser Dimapur district nem team anana asayatsü asoshi maongka agütsüogogo.

Asayamung nung takok anguba team ya Nagaland tenüing nung National Futsal Championship nung asayatsü, koba December ita asayatsü renema lir.

Iba asayamung nung takok anguba team nem senpet sen 1,00,000 aser Runners up team nem 50,000 agütsütsü, ta asayamung ayongertemi metetdaksü.

## BILEMDANGANG

"Temeim agi ajak kokteter."